

Un trayectorio largo di determinacion y vision duradero

Eddie de Veer ta celebra 30 aña di aniversario cu MetaCorp N.V.



ORANJESTAD (AAN): Eduard L.J. de Veer, cariñosamente conoci manera Eddie, ta celebrando 30 aña di aniversario cu e compania MetaCorp N.V. Un pionero y visionario den e mundo di comercio local, cu semper a enfatisa cu e empleadonan ta e 'asset' di mas importante di tur compania. Eddie awor ta celebrando un trayectorio largo y productivo su tras cu un di e empresanan comercial di mas bieu na Aruba.

Rondona por medio di su famia y coleganan di trabao, siman cu a pasa sr. Eddie de



Veer a celebra un trayectorio bunita di 30 aña cu MetaCorp N.V. Mirando atras e ta bisa cu si e lo tabata tin e oportunidad pa cambia algo 30 aña pasa, e no lo cambia absolutamente nada.

"Oficialmente e ta 30 aña riba payroll, pero Eddie a cuminsa traha cu e compania aki for di mucha chikito. Ki chens cu tabata tin, sea ta weekend of vacantie di school, Eddie tabata trahando", sr. Eduardo de Veer ta bisa. Eddie a traha tur caminda: riba dak, den garage, riba truck, y loke ta resalta

di Eddie ta su empeño pa traha sin ningun miedo di trabao y logra su metanan. "Pa mi como tata ta mas importante ainda cu su caracter cu su coleganan semper ta den bon actitud pa trabao, e ta un bon tata, un bon yiu, un bon hende. Anto eseynan ta resalta pa mi", segun sr. Eduardo de Veer. Eddie tin un trayectorio largo di trabao y experiencia su tras, cumisando cu un bachelor den ciencia Electronical Engineering 1991 gradua na Merrimack College na Merca. Na aña 1988, Eddie a cuminsa cu su prome reto como manager na De Veer Theatre N.V. Eddie a continua cu su desaroyo trahando na tur otro companianan socia di MetaCorp manera, Managing Director y otro posicionnan. Na

2009, Eddie tabata encarga cu e maneho di operations di MetaCorp Curacao. Y na 2015, Eddie a bira CEO y President di MetaCorp N.V. unda el a cuminsa dirigi EcoTech, ATCO Aruba, New York Laundry, ATCO Concrete, EcoGas, Tropical Bottling Company of Aruba N.V., Brouwerij Nacional Balashi N.V. y The Cinema.

MetaCorp ta cumpli 100 aña: Manera conoci, pronto MetaCorp lo ta cumpliendo 100 aña di existencia. Den cuadro cu esaki, nan ta coleccionando tur material cu por yuda na forma e historia largo di e compania; potretnan bieu for di aña 1920 cu e compania a nace te cu awe. Fuera di envolvimento den pelicula manera e teatro Gloria, Cinelandia, Principal, Rialto,

Aurora, Esso Club, Eagle Club, Lago Heights Club, Savaneta y de Veer Theatre, hopi no ta na altura di MetaCorp su envolvimento den e industria di transporte y tambe produccion y distribucion di e refresco Coca Cola. Sin laga afo e eventonan, caminata y diferente proyec-tonan cu e compania a yega di organiza den nan historia, manera cabayito, circo y concierto.

E compania tin un fundeshi solido cu un cultura basa riba principianan di inversionnan duradero cu ta kere den inversion y desaroyo di su empleadonan. MetaCorp ta mas cu cla pa e siguiente 100 añanan di progreso cu talentonan manera Eddie de Veer, Robert Carrasquero y Guus Slabbekoorn na cabes.